

03 NOV 1999

PENDEDAHAN BUKTI KETELUSAN, KATA DR LING

KUALA LUMPUR, 3 Nov (Bernama) -- Presiden MCA Datuk Seri Dr Ling Liong Sik hari ini berkata, pendedahan baru-baru ini mengenai salahlaku Datuk Seri Anwar Ibrahim menunjukkan ketelusan masih wujud dan baik di negara ini.

Beliau berkata, ketelusan itulah yang dilaung-laungkan oleh pembangkang selama ini.

"Semua orang mahukan ketelusan, ...ini ketelusan apabila semuanya didedahkan dan semua orang tahu dari A hingga Z," kata beliau kepada pemberita di pejabatnya, di sini.

Minggu lepas, bekas Penolong Gabenor Bank Negara Datuk Abdul Murad Khalid membuat perisytiharan berkanun yang bekas Timbalan Perdana Menteri itu memiliki 30 akaun induk bernilai RM3 bilion yang dikendalikan oleh kroni-kroninya untuk mencapai cita-cita politik beliau.

Sejak itu beberapa pemimpin Umno berkata yang mereka bersedia mendedahkan salahlaku Anwar semasa beliau berkuasa.

Mengenai satu lagi perkara, Dr Ling berkata MCA telah mengemaskini senarai calonnya bagi pilihan raya akan datang dan nama-nama itu hanya menunggu kelulusan pengerusi Barisan Nasional (BN) Datuk Seri Dr Mahathir Mohamad.

"Perdana Menteri mempunyai kata terakhir, itu disiplin Barisan," kata beliau lagi.

-- BERNAMA

MAM PR